

NO. SOALAN: 71

**DEWAN RAKYAT
PEMBERITAHUAN PERTANYAAN
MESYUARAT KEDUA, PENGGAL KEDUA
PARLIMEN KETIGA BELAS
(2014)**

PERTANYAAN : LISAN

**DARIPADA : YB DATO' SRI ABDUL HADI BIN AWANG
[MARANG]**

TARIKH : 18 Jun 2014

SOALAN :

Dato' Sri Abdul Hadi Bin Awang minta **PERDANA MENTERI** menyatakan apakah ada satu perancangan oleh Kerajaan untuk melaksanakan kempen penerangan kepada rakyat Malaysia yang beragama Islam dan bukan Islam ke arah memberi kefahaman sebenar tentang hukum-hukum Jenayah Islam sebagaimana bersungguh-sungguhnya Kerajaan kempen penerangan GST.

JAWAPAN: (YB MEJAR JENERAL DATO' SERI JAMIL KHIR BIN HAJI BAHAROM (B), MENTERI DI JABATAN PERDANA MENTERI)

Tuan Yang di-Pertua,

Kerajaan sentiasa dari semasa ke semasa bekerjasama dengan pihak berkuasa agama negeri untuk memberi kefahaman berkaitan dengan ajaran Islam secara umum kepada rakyat Malaysia termasuklah hukum-

hukum jenayah syariah. Berdasarkan kepada peruntukan dalam **Perkara 121 (1A) Perlembagaan Persekutuan** orang bukan Islam di negara ini tidak tertakluk kepada perundangan Syariah yang sedang berkuatkuasa di negeri-negeri. Oleh itu, penerangan berkaitan hukum-hukum jenayah Syariah tertumpu kepada umat Islam di negara ini.

Di peringkat Persekutuan, Jabatan Kemajuan Islam Malaysia (JAKIM) sebagai agensi penyelaras yang menjadi rujukan bagi hal ehwal Islam, bukan sahaja bertanggungjawab untuk menerangkan kepada masyarakat umum tentang undang-undang jenayah syariah di Malaysia, malah termasuk juga apa-apa perkara yang berkaitan dengan Islam seperti isu halal dan kefatwaan. Selain daripada penggunaan media cetak dan media elektronik, JAKIM turut mengadakan seminar-seminar berkaitan jenayah syariah yang memberi pemahaman kepada masyarakat awam tentang undang-undang jenayah Syariah yang sedang berkuatkuasa pada ketika ini. Pada 16 Disember 2013 yang lalu, JAKIM telah menganjurkan Seminar Pencegahan Jenayah Syariah sekaligus melancarkan **Dasar dan Pelan Pencegahan Jenayah Syariah Malaysia** yang mensasarkan penglibatan agensi kerajaan dan bukan kerajaan serta masyarakat umum ke arah mewujudkan ummah bebas jenayah Syariah.

Selain daripada usaha bagi menggalakkan pelaksanaan prinsip amar makruf dan nahi mungkar secara bersepadu, objektik utama Dasar dan Pelan Pencegahan Jenayah Syariah ini adalah untuk meningkatkan tahap kesedaran dalam kalangan masyarakat untuk menyumbang ke arah melahirkan *khaira ummah* yang bebas jenayah syariah. Pelan ini mengandungi 4 fasa yang bermula pada tahun 2014 hingga fasa terakhir

pada tahun 2020. Pelaksanaan pelan ini menekankan kepada 7 teras strategik berikut, iaitu:

- i. peningkatan penghayatan agama;
- ii. penyelidikan terencana;
- iii. penyelarasan maklumat jenayah syariah;
- iv. pemerkasaan pendidikan;
- v. pemantapan institusi keluarga;
- vi. pengukuhan undang-undang; dan
- vii. kolaborasi strategik inter-agensi

Pelan ini dibangunkan sebagai menyambut pelaksanaan **Dasar Sosial Negara (DSN)** yang merupakan pelan pembangunan sosial berteraskan nilai-nilai murni dan peningkatan keupayaan insan bagi mencapai kesepaduan dan kestabilan sosial, ketahanan nasional dan kesejahteraan hidup masyarakat di negara ini.

Walau bagaimana pun, penjelasan kepada masyarakat bukan Islam dilaksanakan oleh Institut Kefahaman Islam Malaysia (IKIM) yang ditubuhkan untuk memberi kefahaman Islam yang tepat melalui pelbagai program dan aktiviti seperti penyelidikan, seminar, bengkel, forum, perundingan, latihan dan penerbitan. Salah satu bidang yang diberi tumpuan oleh IKIM adalah aspek perundangan Islam di Malaysia. Manakala kumpulan sasar bagi program-program yang telah di atur oleh IKIM melibatkan pelbagai pihak termasuk dari kalangan orang Islam dan bukan Islam. Disamping itu, badan-badan lain juga turut memainkan peranan tersebut, seperti Majlis Dakwah Negara (MDN), Yayasan Dakwah

Islamiah Malaysia (YADIM), Pertubuhan Kebajikan Islam Malaysia (PERKIM) dan pertubuhan bukan Kerajaan (NGO) Islam yang lain. Dimana pewujudan badan-badan seumpama ini adalah bertujuan untuk memberi kefahaman Islam yang tepat termasuk undang-undang jenayah syariah kepada masyarakat umum melalui pelbagai program dan aktiviti.

Untuk makluman Ahli Yang Berhormat, Yayasan Dakwah Islamiah Malaysia (YADIM) telah mengambil inisiatif untuk menganjurkan Muzakarah Jenayah Syariah Kebangsaan pada 29 Mei 2014 secara terbuka kepada orang awam sempena Program Dakwah Negara 2014. Tujuan utama Muzakarah ini adalah untuk mencetuskan perbincangan secara konstruktif dan objektif berteraskan ilmu dan fakta mengenai pelaksanaan Hudud di Malaysia yang melibatkan para ulama, cendekiawan, wakil parti-parti politik dan pemimpin masyarakat. Program seperti ini sedikit sebanyak dapat menzahirkan perspektif yang lebih jernih dan luhur mengenai hukum hudud di samping memberikan kefahaman secara tuntas mengenai pelbagai faktor yang perlu diambil kira dalam melaksanakan hukum hudud di Malaysia.

Sekian, terima kasih.